

所謂得訣歸來好看書若未能勘破太極圈分明八卦象而徒摘葉尋枝雖皓首研窮終是門外漢至外丹爐火尤是譬喻千古疑團于今剖析

忠孝

原夫兩儀之始判也本于無極之初迨太極既剖而降生人以列三才可見人爲萬物之靈其位育與天地參矣上古巢居穴處鴻濛始闢而天地至粹至靈之氣獨鍾聖人一言一行爲萬世法然後五倫立而四維植焉夫事君以忠事親以孝人皆盡知而顧不能身體立行者何邪總由人欲未盡耳身體髮膚受之父母不敢毀傷此人所習聞也然往往於君辱臣死之頃徒

道藏輯要

三寶心鑑

十

壁集四

知自愛其身而以不敢毀傷之言偷生事敵則其毀傷也就甚安得以移忠作孝之語欺人哉至於公爾忘私國爾忘家亦人所熟知也然往往有垂白之親失於仰事而攜其妻妾遊宦四方以致父母呻吟於枕席婦子燕樂於他鄉是又安得以移孝作忠爲辭以欺世哉吾望世人以忠孝二字刻刻存心人欲日盡天理日明或有早失怙恃無從愜其孝思者卽當念吾身爲父母遺體如持盈捧璧勿使少失行檢有生之年父母所賜日新厥德以報親恩是可謂孝矣或如隱逸草萊雖存經濟無由罄其忠悃卽當懷德懷刑以風鄉黨不可謂非忠也苟能如是豈獨仙佛可到亦萬世之矜式也有志者其留意於斯文